



## INTRODUCZIUN

DA FLURINA CAVEGN-TOMASCHETT

*Igl evangeli ei ina cumpart dil priedi sil cuolm. El pretenda bia da nus: carezar nos inimitgs, buca far resistenza al mal e parter senza calar.*

*Entras quels exempels vul Jesus mussar a nus in'otra pusseivladad da s'inscuntrar cun nos concarstgauns; buca gest in'usitada. El muossa a nus da cumbatter il mal a moda creativa.*

*Il carezar il proxim ei in segn pigl esser affon da Diu. Tgi che astga esser segirs dalla carezia da Diu, il Bab, sto buca reagar cun odi e vendetga per spindrar l'atgna honur. Entras la reacziun nunusitada vegn la spirala da vendetga e violenza interrutta.*

## EVANGELI

*Mt 5,38–48*

<sup>38</sup>Vus veis udiu ch'igl ei vegniu detg:

Egl per egl e dent per dent!

<sup>39</sup>Mo jeu ditgel a vus: Buca fagei resistenza al mal! Il cuntrari, sch'enzatgi dat a ti sin la vesta dretga, tegn vi era l'otra! <sup>40</sup>E sch'enzatgi vul far process cun tei ed ir cun tiu vestgiu, sche lai era tiu manti ad el. <sup>41</sup>Vul enzatgi sfurzar tei da far melli pass cun el, sche fai duamelli! <sup>42</sup>A quel che roga tei, dai, e buca volva il dies a quel che damonda in emprest!

<sup>43</sup>Vus veis udiu ch'igl ei vegniu detg:

Ti dueis carezar tiu proxim ed odiar tiu inimitg.

<sup>44</sup>Mo jeu ditgel a vus: Carezei vos inimitgs ed urei per quels che persequiteschan vus. <sup>45</sup>Aschia daventeis vus affons da vies Bab en tschiel, pertgei el fa levar siu sulegl sur buns e schliats, el fa plover sur gests e malgests. <sup>46</sup>Sche vus carezeis numnadamein mo quels che carezan vus, tgei pagaglia meriteis lu? Fan buc era ils publicans quei? <sup>47</sup>E sche vus salideis mo vos frars, tgei fageis lu aparti? Fan buc era ils pagauns il medem? <sup>48</sup>Seigies pia perfetgs sco vies Bab en tschiel ei perfetgs!